

嘉靖

皇華集

十三

皇華集卷之二十三編目

嘉靖十八年己亥頒冊立 皇太子恭上 皇天上
帝泰號二詔使一

正翰林院侍讀華 察

副工科左給事中薛廷寵

遠接使議政府左贊成蘇世讓

蘇軾詩集卷之十三

蘇軾詩集卷之十三

蘇軾詩集卷之十三

蘇軾詩集卷之十三

蘇軾詩集卷之十三

蘇軾詩集卷之十三

序

洪惟天朝掃除腥穢再造區宇列聖相繼治
化洋溢今皇帝至德應天丕承大寶一視同仁
罔間內外仁恩汪濊文運泰亨於是乃命鴻
儒碩士崇論宏議講求千古之墜典特舉一代之
盛禮躬詣園丘拜上皇天上帝泰號躬詣太
廟崇薦皇祖考聖號遂渙發綸音大誥天下
又因羣情預定國本播諭萬方嗚呼盛哉至此
而尊祖敬天報答生成情文備至蔑以加矣惟
我獎邦密邇東漸之化至誠事大侯度罔愆朝廷

之待我亦無異內服凡有吉慶詔誥之使必擇文
章道義有重望者遣之今者 帝命翰林院侍讀
華公察工科左給事中薛公廷寵賁擎二 詔來
布德意東人仰之如景星儀鳳深感朝廷寵綏之
惠二公受命不遑寧處每懷靡及自 帝京至于
下國四千有餘里而一箇月餘竣事旋車不曾有
遲畱淹滯之色我 殿下祇承二 詔兢惶感戴
推恩境內宥罪錫爵設科取士無非所以重朝廷
之慶而欽使華之至意也二公旣去而惜不可畱
思慕備至而不可忘也則乃命臣曰令我 皇明

天覆地載兼容並包懷生之類無不浸潤至澤
我東實偏寵私天語丁寧錫賚便蕃二公之來
誠意惇厚禮義雍容道途吟詠珠璣溢目區區小
邦無以仰答鴻造之萬一欲編二公寶唾之餘
刊印垂後俾吾東人得觀皇朝風雅之盛而有
所矜式於無窮也爾其序之臣竊惟詩之道尚矣
夫詩者發於性情陶於氣化氣化隆則從而隆餒
則從而餒紆餘雄渾平淡典雅者治世之音也刻
峭輕浮華蕩靡麗者衰世之音也能得其性情之
正而發爲雅頌之音者三百篇是已二公當氣化

之盛稟山嶽之英得學問博雅之美發而爲詩頃
刻數千言而無不典雅自中規矱可以笙鏞乎治
道可以黼黻乎 皇猷可以列於 皇朝制作之
盛而周家之風雅不獨專美於往古也臣以不材
濫蒙 恩命奔走迎送獻酬于樽俎之間者至于
三四耳其語音目其容儀溫潤純粹揖讓周旋無
不中禮信乎樂只君子邦家之光而 皇朝文物
之盛人材之衆從可知也何幸身親見之嘉靖十
八年己亥夏六月下澣資憲大夫吏曹判書兼知
春秋館同知書筵成均館事弘文館提學世子左

賓客五衛都摠府都摠管臣成世昌謹序

賓客正肅滿庭我將獻管皇叔甘昌藟

皇華集卷之二十三

登大平樓賦

華 察

欽 皇命而咨諏兮駕輜車於四方瞻東國之麗佳
兮登茲樓以徜徉嗟樓居之巖業兮忽連亘乎雲霄
挾星辰之不遠兮下俯視乎周郊崇堂屹乎其前兮
嘉木芬而在後寢室閔其幽深兮長廊帶乎左右緬
南山之當戶兮北嶽若拱揖乎虛牖鬱王宮之嵯峨
兮瞰閭閻於輻輳晴川隱映乎曲檻兮明月照乎綺
疏鳥驚飛而上下兮亦翔集乎旁隅旣徘徊而顧眺
兮還徙倚而躊躇非景物之依人兮固自得於懽娛

慨天地之無窮兮羌人生之若浮念行樂之貴及時
今斯憑虛而盤遊昔王粲之琦琚今願暇日而銷憂
况行邁之逐靡兮不沉吟於故丘幸逢時世之泰康
今同車書於要服莫民物之攸居今暨斯樓之如翼
俾余偃蹇姣服而遊譌兮沐龍寵之明光懷魏闕其
天上兮余獨息駕乎東荒悵斯遊之不可再兮恍乎
其若夢寐倏流星之過余目兮徒想像夫光彩獨撫
席而遲留兮又不免乎離去駕彼四牡以回旋兮耿
暈飛之如覩

次韻

議政府左贊成蘇世讓

惟皇家毓慶于燕媒兮降丹詔於東方翩翩
雙鳳之嚙命兮戾下界而相狎覽茲樓之所處
兮屹歸然而干霄鬱佳氣之蔥籠兮占勝賞於樂
郊門崇禮兮當前山拱極兮擁後列宿隱映於桷
振兮周閣邈迤於左右嘉樹璀璨於別院兮瑞旭
炯晃於高牖綺陌綯其無塵兮萬瓦鱗差而相輳
奇花異卉泛泛其流光兮香霧濛濛於碧疏穀雨
隨車而霽霈兮澤涵漬於海隅聊暇日而登覽兮
倚雕欄而躊躇樂大平之有象兮玩時物而自娛
噫普天莫非王土兮任蓬轉而萍浮廣咨詢而懷

靡及今匪從事於遨遊向北風而披襟兮酌綠醕
而忘憂戲文墨於餘事兮散唾珠於青丘茲乃
皇恩之溥博兮仁一視於五服伊我邦世被漸化
今謹事天而翼翼皇覽揆余之忠藎兮申晉錫
之寵光是以吾東有此衮衣兮荷隆私於包荒
謇余陪侍乎杖屨兮悅相接於宵寐適子館而授
子粲兮想望其風流與文彩何此歡之不可恃兮
駒皎皎而將去悵雲泥從此遠兮杳音容兮難再
覩

遊翠屏山賦

華察

曠茲山之竄篠兮逖駕言而來遊既俯歷乎重林兮
亦仰涉乎崇丘面蔥秀其若屏兮鬱蒼蒼乎多翠造
化發其丹青兮神明施其粉黛儼嶽岑而鬱律兮上
下綿而成華彼衆芳之韜匝兮誠繪畫其可嘉嗟余
被命而翱翔兮庶暫息乎景光躡玄躋而旋登兮
聊周流以襄羊爾乃攬白雲之英兮搴明月之餘輝
對河漢其咫尺兮若人間之可遺崇岡突而駉駉兮
深谷委以谿訝既登高而望遠兮遡巖屏而委佗豈
惟是黃鵠之舉兮覩天地之圓方將聘目於斯郊兮
令余懷之彷徨忽憑虛而澹蕩兮還宛委以幽尋覩

羣木之秀色兮聽鳴鳥之清音雉雀紛其並集兮麋
鹿襍而成行松篁被風而陳響兮菌芝照日而含章
藉豐草而匡坐兮酌流泉以飛觴翳帷幄之懸險兮
何必廣樂之高張愜盤遊以縱目兮歷層巒之無窮
嗟翔伏而奇出兮又安望夫玄圃與閬風羌先民之
淑懷兮願漱泉而枕石余旣無叔子之悲兮亦何藉
乎東山之劇順大化以周旋兮忽流連而忘返旣日
夕而言歸兮望脩途之猶遠

次韻

蘇世讓

若有人兮好脩慕子長之遠遊肅承

命而于邁

今弭玉節於青丘睠茲山之如屏兮鬱林木之蒼
翠時新雨之初霽兮列岫森其橫黛矗奇巖兮並
峙宛壺中之九華萃佳勝於一區兮又何必遠求
乎永嘉幽花羣草不知其名兮弄嬌姿於晴光王
喬幾時跨鶴兮初平曾此牧羊藹秀色之蔥蔥兮
吾知夫韞玉而含輝掬清泉而濯余襟兮離俗氛
其如遺步長松之陰陰對深谷之鈇鈇澹容與而
忘歸兮長余佩之委佗欣勝境之可踐兮騁遐矚
於一方顧茲溪山之遇賞兮閱幾人之徜徉古逕
今苔侵嘅歲月之難尋前圭峰而後雲岡兮羌嗣

續其徽音緬遊跡之宛然兮屹豐碑於周行發揮
又值此天仙兮闡前賢之文章輸景物於領略兮
付情興於杯觴觀捕魚與獵雉兮籠傑句於鋪張
仰高名如北斗兮與此山而不窮雖鴻跡不可以
畱兮挹萬古之清風幸余趨走於下塵兮猶廁玉
之頑石何離合之無常兮樂未洽而悲劇水赴壑
而不回雲出岫而知返悵斯遊之難再兮望西路
其脩遠

燕慶會樓賦

回程到碧蹄館
製送于殿下

薛廷寵

皇帝以嘉靖十七年仲冬朔日恭上 皇天

泰號于南郊明年仲春吉乃冊 皇太子正
位東宮爰稽典則若曰維朝鮮畏天謹憲勤
禮秉貞其併遣使 詔之於是乃 命翰林
院侍讀臣華察工科左給事中臣薛廷寵充
正副使以行廷寵不敏獲介使事乃陛辭因
龍章歌皇華卜日戒行下三河趨薊門遵山
海放于襄平東渡江歷義開諸州以四月十
日抵漢城 王乃親率邦大夫士肅誠郊迓
擁 詔入勤政殿宣讀拜舞禮成而退翌日
張燕于慶會樓樓壯麗雄勝亭臺池沼花卉

奇植靡所不具燕之日風和景明雍容周旋
百禮式洽其於慶會之義允哉維諧廷寵乃
陳義比詞而爲之賦賦曰

皇建極大一統今際海邦罔不承服嗣列聖之廣
猷今抑神明又超獨端惟古道今兼作述謂皇帝
天之子今天稱皇義斯弗拂爰上泰號告園丘今玉
冊昭其有燭帝錫洪佑震位良今前星繼曜而重
光肆建儲以奠大本今慰屬望于羣方監國撫軍稽
厥常今臣民翕而頌揚侔夏啓與周誦今占億萬祀
有道之長旣尊天享帝今鴻業熙其燕昌道有大而

無外兮慶有衍而必彰奎文龍檢燦炳炳兮使者分
道而肅將維朝鮮軌文而躋化兮恩湛歲以無疆伊
余邁此休會兮羌簡命而趨蹌祇承德意徂茲東兮
駢攬轡而彷徨屬春月之載陽兮原隰華而煌煌余
戒青龍使先導兮飭仙子俾抗旌星輶駕而信邁兮
第長雲而遐征朝余發乎冀之野兮暮弭節乎灤之
濱旣涉遼以奔驚兮又逾江而問津矯萬里而翱翔
兮斯至止于漢城龍旗法仗敬竢迎兮草木渥而輝
榮王逡巡跪而展誦兮爰敷播于臣民爾乃普惠
蠲賦兮亦論德而序升萬情感悅兮曠儀告誠三光

效順兮天日朗清海邦丕式兮 帝心載寧旣饗獻

兮就余館之大平曰慶會有樓兮以樂嘉賓卜辰治

幕兮椒蘭鬱而芬馨朱闌玳梁敞四楹兮羽觴流而

絃簧陳軫紫庭之多麗兮冠佩者至三千人東北嶽

之拱極兮包弼雲名山而列屏銀河瀉而爲沼兮洵沉

璧而浮金虹爲梁以環碧兮卉木錯而搖英積雲左

右以傳彩兮霞表裏而媚晴絢練恍惚百怪潛兮勢

晦明而無恒林散錦以吸翠兮禽鳥遞韻而喈鳴幼

余紛而好覽兮遵亭榭以怡心余旣畢物而暢性兮

陽鳥逝而西沉何掩映橫余前兮倏流電而飛星乍

穿杪而衝漢兮復越莽而墜庭爲煙爲霧兮如雷如
霆緬樂事之弗可極兮余吁抑志而言旋周章惑
類夢寐兮豈神遊乎九天彼乘槎不可信兮余固真
遇乎列仙蒞宮璠實歸而莫可想憶兮聊寄萬一於
簡篇余將返命于上帝兮謂余羽化而霄騫衆詫余
之詭幻兮而詎知其亶然亂曰明明日月照海隅兮
有赫綸音御星車兮合情廣志東人愉兮式燕以敖
我心舒兮觀風聽樂余有思兮曷歸乎余躊躇兮固
髣髴而疑迷余遊于蓬萊之廬兮

渡鴨綠江次雲岡韻

華察

春江三月送浮槎
日落潮平兩岸沙
天地本來分異域
風塵此去媿皇華
波翻鴨綠初經雨
柳帶鵝黃未着花
四海車書今一統
東藩文物自商家

次韻

蘇世讓

溶溶晴浪泊靈槎
騎從如雲簇晚沙
始識天公分物色
故教仙客管春華
煙含濯濯江邊柳
雨浥離離岸上花
一脈斯文情誼在
車書同屬帝王家

渡鴨綠江

薛廷寵

九連城晚瞻東服
鴨綠江明照使袍
風日正逢春色好
煙波應助勝遊豪
羣飛鷗鷺驚舟楫
兩岸旌旗伐

鼓磬萬里均霑新雨露前星高燭動謳謠

次韻

蘇世讓

江城昨夜雨蕭蕭今日晴光映錦袍萬里煙雲迎
使節三春花柳惱詩豪輕風拂拂時翻旆羽騎紛
紛亂擊磬已覺皇恩區宇滿歡聲還作太平謠

義順館次雲岡韻

華察

輕風吹浪過江城遙指東藩是去程千里封疆初入
境諸州團練盡屯兵春含喜色花爭舞雨沛皇恩
道爲清香輦共迎丹詔至百僚瞻拜動歡聲

次韻

蘇世讓

二水迢迢繞一城便分西北往來程已經鶴野三
千里又擁龍灣十萬兵滿目風光春欲老入簾山
色句還清渚煙汀柳蒼茫外隔岸時聞欸乃聲

次義順館

薛廷寵

春風簫鼓上樓船萬里孤城落日邊丹闕龍亭迎
鳳詔羽騎仙仗擁鵷聯文章箕範通中土禮樂天
朝盛近年邸第從容燈燭夕不妨蹤跡更飄然

次韻

蘇世讓

玉節遙登鴨水船清風先已滿東邊前星照處
鸞書下儀鳳來時獸錦聯四海謳謠逢舜日萬方

臣妾仰堯年無端小雨隨天澤野草江花亦霈然

良策館次雲岡韻

華察

野館春深晝欲迷落花香染燕巢泥龍川繞境元分
郡鳥道飛雲半度溪碧草輕含細雨濕青山遙帶夕
陽低東遊到處堪乘興何事歸心祇向西

次韻

蘇世讓

駘蕩韶光興轉迷羸驂石逕踏輕泥依依遠樹圍
平野短短垂楊覆淺溪白霧似煙春雨細碧峰如
畫暮天低前頭簫鼓環仙詔望眼長勞紫極西

良策道中用雲岡宮諭韻

薛廷寵

肩輿盡日路全迷
莽逕新除覆翠泥
亂草刺花初照眼
青山送雨又鳴溪
江亭煙柳春光暮
野寺昏鐘日色低
蹤跡自疑還是夢
凭欄搔首看遼西

次韻

蘇世讓

春陰釀雨欲淒迷
長路愁穿滑滑泥
奔霧逐風歸遠岫
亂流經野赴前溪
潮從小浦平時上
燕掠空蕪盡處低
高捲湘簾望山氣
夕陽猶在短峰西

至良策延國中諸使及牧守以下詢之用雲岡

宮諭韻

薛廷寵

東國江山麗天家
德化多觀風來獨
遠對酒意如何

諸道爭迎節羣賢並振珂從容訪幽側定有卧林阿

次韻

蘇世讓

花柳催詩發珠璣落紙多舊聞閔府庾今見水曹
何諫苑方簪筆詞場久振珂調高難屬和俚曲媿
陽阿

發良策館次雲岡韻

華察

江渚沙高半作丘雪消新水漲春流花含宿霧紅初
重柳拂晴煙翠欲浮萬壑風清松籟發千巖日出雨
痕收平生不識扶餘道回首分明是夢遊

次韻

蘇世讓

萬箇蒼官擁石丘清溪斜繞驛門流山村雨過花
齊發野店煙生樹欲浮迢遞鴈聲天外盡霏微嵐
氣坐來收自慚凡骨非蟬蛻夜夜霞觴侍燕遊

喜得遠迎使蘇贊成所和詩用雲岡宮諭良策

館韻

薛廷寵

閒將詩句謝林丘此地相逢幸勝流山水知音情獨
契風煙落紙氣猶浮商家教化傳來遠東國才名早
見收驛路野花春色好追隨尊酒作佳遊

次韻

蘇世讓

崧岳由來異蟻丘菲才安敢接仙流片言褒重詩

中見五色光生筆上浮鞍馬不愁關路永風煙還
有錦囊收文章剩得江山助司馬當年好遠遊

得蘇左相和章口占答贈

華察

聖代文風遠藩邦俊彥多位高同季子才敏似東坡
地險江爲塹時清海不波春來富篇什花鳥奈愁何

次韻

蘇世讓

美譽曾孚望高才早患多緘章對螭陛持橐上鑾
坡曉日龍川道春風鴨水波真成佳會合不分擬
羊何

發良策雨至

薛廷寵

到處春多雨
長途客正愁
空濛迷望眼
淋漓灑怯前
騶
亂壑新流急
煙林過鳥投
故園桑柘好
農事足田疇

次韻

蘇世讓

一雨鳴山館
連宵送客愁
未應淹使旆
聊復戒征騶
朽質唯樗散
明珠屢暗投
待看風物霽
膏乳潤春疇

車輦館蟠松次雲岡韻

華察

松質本孤直
盤屈亦自好
古幹偃蒼虬
重陰圍翠葆
靈根自徂徠
何年移海島
鐵山無時頽
千古同不老
春來風雨多
清標絕汙潦
疎影落空壇
月明閒不掃

豈如枯楊稊朝發夕委草亭亭歲寒姿四序無榮槁
天子建明堂禮樂興周道羣材滿山林致用應須早
誰云一寸朽因之棄合抱何當入中國八柱擎蒼昊
斧斤任匠氏能支大厦倒

次韻

蘇世讓

愛爾一株松獨占清陰好盤根托厚地偃盖圍翠
葆山風響窸窣驚濤殷海島枝舉舞鶴翥鱗感卧
龍老關河五六月路上愁炎潦披襟卧其下熱惱
方一掃何須醒醉石不要迎涼草鬼物尚訶護千
秋長不槁縱未扶明堂猶能蔭官道遲遲含晚翠

肯數園花早庶將保歲寒不辭成連抱大庇喝死
民亭亭拂穹昊豈比倚江枏委棘傷虎倒

車輦道中晚霽次雲岡韻

華察

客路流光荏苒天涯歸夢迢遙春去鶯花寂寂曉來
風雨蕭蕭

其二

石上流泉汨汨松間落日亭亭綠樹深迷野色黃鸝
巧送春聲

次韻

蘇世讓

雨霽江干草綠雲收野外天遙遶岸鳴泉泐泐嘶

風征馬蕭蕭

西塞高低客路東
風長短郵亭杏花野
店春老磔磔時聞鳥聲

初見杜鵑花次雲岡韻

華察

春深一樹爛緋霞
細濕臙脂帶雨斜
望帝不知何事泣
故將血淚染成花

次韻

蘇世讓

滿眼紅蒸海上霞
石崖沙岸任欹斜
杜鵑亦喜天仙至
先放東風一樹花

車輦館雨中見松

薛廷寵

雨色催征騎松陰過嶺迷分林猶有此對景可無題
煙重浮青靄風鳴瀉碧谿歸來薰氣爽定擬共攀躋

次韻

蘇世讓

風雨連空暗松林望欲迷幾年依古館今日入新
題秀色浮雲漢寒濤碎石谿應須恣歡賞歸路許
重躋

林畔館次雲岡韻

華察

三月東行未見花曉來林畔一枝斜春風走馬詩偏
富落日啣杯酒更賒絕域幾人持使節出門何處望
京華臨溪却愛晴光好綠水粼粼漾碧沙

次韻

蘇世讓

東風開遍滿山花紅白枝交帶雨斜
遠道關心雙節迥長安回首五雲賒
煙光繞望添詩料春事無多感物華
安得卸鞍清澗畔芒鞋隨意踏輕沙

林畔館晴望

薛廷寵

水光山色競芳鮮到此忻逢雨後天
花萼夾林通淑氣松陰布嶺閱華年
銀鞍千騎軍容麗草舍孤村野趣偏
遙憶江南三月景異鄉雖好總愁邊

次韻

蘇世讓

淡淡遙空霽景鮮風光正屬艷陽天
登高作賦推

能手走馬看花憶少年一帶溪廻流更淨數家門
掩地還偏雕闌倚罷無塵想極目雲山落照邊

殘春風雨用雲岡惜暮春詞五

薛廷寵

綠楊枝上黃鶯小長路關情花鳥三春了雲水迢迢
鄉夢杳天桃穠李空開笑江笛一聲天正曉雨色
愁人征騎忙多少紫荇風牽羅帶繞晚來頓覺輕寒
峭

杜鵑花落流紅雨人在天涯萬里傷春去半捲朱簾
當晚嶼玉闌倚遍無情思寶馬香車五陵路鶯轉
上林退朝花底度腸斷蓬萊回首處鷓鴣啼罷山頭

樹

右蝶戀花二闕

落花啼鳥送春風
馬首青山日日東
江柳迷人睡正濃
問來鴻何處月明鄉夢中

右憶王孫

昨夜溪頭風雨過
美人搔首驚遲暮
鶯轉兩三聲雲山無限情
杜鵑花底濕鷓鴣啼欲泣
高樓傷客心不語自鳴琴

右菩薩蠻

春三月懊惱酴醾芍藥香
車寶馬長安陌
轉眼芳菲

歇 况是天涯孤客目斷嶺頭雲白昨夜小窗疎雨
滴欹枕羅衣濕

右謁金門

黃鶯對雨交愁濕春去也更待何日十里紅樓人倚
闌陌頭楊柳愁邊色 謾向夕陽聽玉笛且儘春光
羅綺席春去春來無盡期客路韶光棄如擲

右玉樓春

次韻

蘇世讓

敝邦音調有異不慣此作然盛意不可虛
負錄呈求教伏希斤正

樓頭客子春心小
蝶恨花愁草草都忘了
芳信不傳雲杳杳
美人誰與閑孤笑
庭院沉沉春欲曉
萬事思量未見年
還少愁似縈車千緒
繞無端捲幔東風峭

終朝庭院廉纖雨
簾外小桃借問人何去
海上三山隔島嶼
瑤英識我歸來思
芳草萋萋迷去路

無數雲鴻邇來飛
不度惆悵別愁難盡處
風花揔

是傷心樹

右蝶戀花

無端花絮曉隨風
送盡春歸我又東
雨後嵐光翠

欲濃寄征鴻
家在山前萬柳中

右憶王孫

若到曉鍾春已過春光此日傷兼暮誰送斷腸聲
黃鸝知客情山花嬌靨濕似帶傷春泣綠酒瀉

杯心捲簾空抱琴

右菩
薩蠻

對花月病後還拋舊藥忽憶去年垂柳陌子規聲
未歇千里殘春孤客愁見花紅頭白不有小槽

春酒滴青衫那禁濕

右謁
金門

海棠含露臙脂濕小雨霏微欺晚日傷春人復捲
簾看目斷萋萋芳草色誰吹嘹亮江城笛應惜
風花飄錦席金龜何處酒須賒莫把菁華空枉擲

右玉
樓春

杜鵑花盛開次雲岡韻

薛廷寵

青山雨裏着晴霞
山後山前幾樹斜
莫道南州春色好
東風隨處總開花

其二

摘取枝頭幾朶霞
笑將春色插簪斜
長安元是看花客
纔見花開便愛花

其三

東風幾度散緋霞
十里紅樓倚望斜
惆悵春歸花事了
杜鵑莫上杜鵑花

次韻

蘇世讓

酡顏浮暈醉流霞吟倚東風日半斜昨夜前村新
雨過朝來開盡萬山花

滿眼紅芳襯晚霞崩崖曲澗影橫斜如今老子春
心少却愧華顛醉插花

千林繚繞赤城霞灼灼繁英映日斜客路春光隨
處好任他閑落故山花

雲興館次雲岡韻

華察

佳氣晝氤氲青山靄白雲蒼茫迷野色縹緲亂峰紋
水樹陰重合煙花濕自芬田中有龍見爲報冊儲君

次韻

蘇世讓

候館依林麓尋常宿白雲春空多變態晴日自成
紋簾捲山開畫詩清筆吐芬蓬萊疑在望遙拜
聖明君

同盧河次雲岡韻

薛廷寵

使車日日深山底隔山遙見新橋子東人告我同盧
河前驅簇簇如緣蟻我家本在閩海南已隔東遼千
萬里如何更望同盧河却望遼川是故水橋頭杜鵑
莫亂啼嶺上白雲正飛起

次韻

蘇世讓

河從西北千山底兩岸招招有舟子長虹卧波度

行人人影紛紛亂蜂蟻當前碧嶺高嵯峨借問雲
興隔幾里江山有待玉人過龍節煌煌照河水鼓
角數聲波浪涌一雙鷓鴣忽驚起

郭山孝女

華察

窈窕郭山女遺丘隱薜蘿雲興館東望華表尚嵯峨
豈不憐吾指如當親病何指殘猶可續親卧更疇扶
所以殷勤意幾希大丈夫緹縈尚存父曹女獨傳娥
高誼標門戶春深匹馬過香魂雖已遠蜃碣未容磨
莫謂東藩僻清風分外多

次韻

蘇世讓

斯人已云逝遺迹寄煙蘿誠同日皎皎名與山
峩峩身是母遺體一指於吾何忘軀能報親人紀從
此扶勇烈有如此誰謂女非夫英聲粲黃絹不獨
數曹娥作詩潤色之天仙今又過短碣豎道左萬
古長不磨却被採風謠傳芳應更多

郭山孝女

薛廷寵

郭山孝女金四月當午斷指曾煮藥只今一去百十
春華表碣石相突兀一種青山草離離孝女之門行
人歇從前緹縈感漢皇未有此女行奇絕江魚竹笋
俱有聲丈夫之行猶可說綽約蘭房閨女流孝心天

地爲昭灼玉堂青瑣天上來淋漓詞翰龍蛇躍定知
此女名不磨貫日行空齊山岳吁嗟東方教化邦一
統文明况旁燭郭山孝女豈偶然元精間氣鍾真淑
國風歌謠采閨門皇華使臣徧諏述我欲獻之列樂
官示爾世世承芳躅

次韻

蘇世讓

人同孝心天所性許國猶有不嘗藥彼微一婦亦
何知名與郭山俱律兀當時斷指血淋漓此心耿
耿終無歇從來至誠物亦動明神不與人隔絕觀
過知仁聖有訓刳股失禮無足說勿藥之藥自有

喜吉凶何須待龜灼曹娥千載可同流大書碑字
龍騰躍皇華一顧採民風萬古文章同海岳東方
孝理著自古況今聖明調玉燭關雎首閱風化
原女子有行男私淑願爲彌縫獻天子不有斯
文亦何述倘得諮詢編東國豈唯郭山有遺躅

新安館次雲岡韻

華察

東來到處方言別乍聽分明燕語喃丹闕共看遙拜
命紫泥親捧未開函風雲常擁旌旗道雨露新沾松
栢巖三月韶光今日盡賜羅輕着應春衫

次韻

蘇世讓

皇朝集
輝輝晴日弄清酣
庭院風微鳥語喃
春老關河迷客興
路遙鄉國斷
書函綺霞段段明
全浦花雨甃甃落
半巖物色錦囊收拾盡
篆香消處解征衫

新安道中有石如人形

華察

山巔竒石誰削成
衣冠縹緲如人形
風摧雨蕩不得動
環詭應是山之靈
君不見玉女峰
仙人掌造物巧幻
多神狀吁嗟乎物
類猶能肖人色
安得人心化爲石

次韻

蘇世讓

風斤月斧天假成
有石形於不可形
蒼苔爲衣蘿

作帶便有村巫來乞靈山下征途多鞅掌閱盡塵埃辛苦狀皇華戲語空是色不須分別人與石

新安館迎 詔張宴

薛廷寵

東藩聯別館北極候 皇綸邸第分林麗衣冠繞仗新晴雲闕輦道祥日應嵩辰虎拜周庭肅龍亭漢詔陳園丘頒泰號儲禁冊麟振協氣融三極明馨格萬真前星光揭象少海湛涵春迎節遴賢輔含恩祝聖人華堂清燕設綺席縟儀伸樂按鐃歌部香傳蘭麝續千燈輝不夜圍幃淨無塵獻酢流杯竿蹌趨序主賓省方知國阜觀禮美風淳劒舞輕萍迹天遊作夢

身登樓能有賦倚馬劣通神山水知音遇璠璣屬和
頻斯遊殊勝絕聊此叙良因

次韻

蘇世讓

休祥熊協夢大慶鳳頒綸夏后謳歌沸周邦命脉
新多男符善祝綿祚屬昌辰頌溢羣方喜儀繁百
禮陳潛淵龍矯矯趨陞鷺振振共覩星重耀從知
帝有真需雲方霈澤解雨亦隨春專對紆隆眷客
詢有偉人騷鸞仙駕遠超海壯懷伸出塞軍容盛
沿途物色續風輕翻旆旄天霽息氛塵暫許開公
館時從燕上賓丰儀瞻肅穆佳句襲清淳入室薰

香臭登門媿老身
方言雖自異詩興不無神
准擬開懷久欣蒙贈語頻
翻思成一別後會更無因

納清亭次雲岡韻

華察

問俗停驂到水頭
溪邊故着小亭幽
何人浪說蓬萊島
此地翻疑鸚鵡洲
萬里白雲勞遠望
一春青瑣幸同遊
憑高尚怯春羅薄
四月風清近麥秋

次韻

蘇世讓

晴嵐冪冪樹林頭
溪上孤亭景最幽
柳彈碧絲搖斷岸
花明紅錦倒芳洲
詩仙蹤跡畱佳句
星使風流繼舊遊
始信地因人擅勝
高名從此耀千秋

納清亭

薛廷寵

四月一日納清亭客子東行此暫停風日偏能通淑
氣野光隨處送幽馨直前來逕千條綠斜出穿橋一
水青爲報南薰初應序歸時正好踏沙汀

次韻

蘇世讓

柳陰松翠護閒亭句引仙輶爲暫停塵世幾人承
咳唾瑤牋隨處灑芳馨蒲芽出水抽新綠荇帶牽
風漾舊青最愛溪邊雙小鴨背人飛去過前汀

過嘉山嶺紀懷次雲岡韻

薛廷寵

輜車來度亂峰頭風日幽清似小秋采芑敢言行役

苦對花應念歲華流天涯萬里雙眸闊江上孤舟一
水浮此地從來可乘興仲宣且莫賦登樓

次韻

蘇世讓

踏石穿林上嶺頭蒼藤古木自春秋花從山鳥飛
時落泉向巖根缺處流蓬梗定成他日憶乾坤深
覺此身浮胸中八九吞雲夢奚啻元龍百尺樓

控江亭

華察

危亭百尺控晴江落日登臨洞八窻雪盡亂流春汨
汨月明孤枕夜淙淙地分遼海歸吾土天爲皇家
壯此邦穩放扁舟蕩輕槳濟人何必用徒杠

次韻

蘇世讓

羣山虬走飲長江水色雲光鎖石窗極浦歸帆看
杳杳淺灘鳴瀨聽淙淙清波浩渺通銀漢脩路透
迤接上邦近說楣間驚虎卧何人揮却筆如杠

亭有

龔詔使題
額故云

登控江亭次雲岡韻

薛廷寵

滄海何年理釣船却來亭上挾風煙捲簾乍許邀雲
入借榻應思伴鷺眠若箇漁歌當小浦欲將遠意問
前川巖花澗草清相照無數閒愁到客邊

次韻

蘇世讓

輕波漾漾泛樓船錦纜牙檣劈暮煙地接蓬瀛邀
鶴駕風傳簫鼓動龍眠長洲望眼迷芳草落日歸
心逐逝川回首正瞻天北極莫言身在海東邊

渡大定江次雲岡韻

薛廷寵

大定江頭上客船正逢晴日散輕煙巖畔野花看一
笑水邊楊柳靜三眠魚吹細浪偏隨楫鷗落平沙却
近川忽憶蒼浪行樂處不堪回首暮雲邊

次韻

蘇世讓

手擎丹詔上江船白鳥驚飛破暝煙草色似茵
沙似雪桃花如笑柳如眠山迎車騎圍三面風捲

旌旗度兩川
跋馬又遵楓浦去
落霞殘照暮天邊

楓浦次雲岡韻

薛廷寵

青山落日風林舞
杜鵑花落如紅雨
客子回頭却憶
春一雙白鳥飛楓浦

次韻

蘇世讓

風前紫燕雙雙舞
草綠花紅含宿雨
灘頭日落小
橋橫滿目寒煙迷極浦

渡清川江次雲岡韻

華察

落日清江初放船
江樹離離生翠煙
孤忠自信鯁不
暴野老相忘鷗共眠
聲動鼓鼙聞隔岸
影搖旌蓋照

晴川東人快覩 天朝客指點星槎銀漢邊

次韻

蘇世讓

長風吹送木蘭船遙望危樓倚晚煙樵路細緣沙
岸熟漁翁閒傍釣磯眠數聲柔櫓沿孤島一片寒
雲落遠川莫訝韶光今已盡鶯花畱與入吟邊

渡清川江次雲岡韻

薛廷寵

落日輕風漾碧波畫船掛纜跨江沱百壺送酒休停
飲三月春光昨已過

其二

江流自在望郵亭畫舫疎尊興亦清異域幾人能燕

賞夕陽影裏放歌聲

次韻

蘇世讓

澹澹長風動素波
蘭舟搖曳泛清沱
蘋洲潮急岸
花落知是前宵江雨過

畫鷁橫江載小亭
滿川風物坐來清
佳人盡日傷
春思何處高樓一笛聲

安興館夜燕次雲岡韻

華察

急管高歌奏合歡
錦筵紅燭照琅玕
一春底事花開
晚四月偏多麥秀寒
馬踏青山遶海畔
鳳銜丹詔下雲端
藩王如問東朝事
爲報服衣尺若干

薛廷寵

江上暮林歸鳥雀樓頭玉笛吹琅玕入門香氣醞能
煖對酒筵歌愁欲寒無數風光生眼底豈知蹤跡落
塵端天涯到處且拚醉分外微名總不干

次韻

蘇世讓

謾奏蛙音奉宴歡却慚仙吹響琅玕賓筵秩秩開
良夜珠箔重重障薄寒豪飲祇期畱燭跋深情還
荷入毫端晴窗盥手披瓊玖塵累從今不敢干

正使

蓬島雲煙開活畫仙曹詩句燦珠玕杜鵑花好先

愁落楊柳風多尚怯寒客久羈懷元不禁春歸離
思又多端夜深忽罷江城夢清絕應無俗慮干

右和

副使

百祥樓

華察

高閣飛翬霄漢邊氤氲佳氣繞山川朱簾掩映鼉鼉
窟翠靄霏微草樹巔天與水光相上下鳥隨雲影共
盤旋韶華莫訝東藩別自是朝來景物鮮

次韻

蘇世讓

納納乾坤望眼邊飄然詩思滿晴川樹陰斜罩平
沙外雲影遙分亂嶂巔春盡孤城花爛熳潮通三

島

樓下江中
有三島

水迴旋塵蹤偶躡仙遊後驚看華牋

墨色鮮

登百祥樓

華察

遠涉三韓道閒登百尺樓東來接滄海西望入燕幽
帝德乾坤大長江日夜流藩封存島服仙客下瀛洲
尊俎開華燕衣冠屬勝遊韶光春欲去爽氣雨初收
曉色迷花霧輕寒送麥秋遠山橫翠黛古木偃蒼蚪
幻夢疑蕉鹿忘機狎海鷗川原共繚繞魚鳥自沉浮
煙柳津亭路風帆沙浦舟徘徊消客况徙倚豁吟眸
率土皆臣妾朝廷共載休周南滯司馬直北拱宸

旒謾賦皇華什常懷杞國憂平生丈夫志不作兒女
愁慷慨蘇卿節從容箕子疇江山頻眺望民俗備咨
諏許國終歸漢陳情未報劉百年真瞬息萬物總浮
漚遠岫雲歸樹疎簾月掛鈎憑軒重回首明日又江
頭

次韻

蘇世讓

乾坤開勝境花柳護名樓入漢朱薨迥吞雲綉闥
幽千尋臨絕壁萬古帶洪流灑落壺中景蒼茫海
上洲塵寰雲外隔羽客月邊遊山近嵐光滴天長
海氣收窻虛常不夜軒爽尚畱秋勝日延仙侶雕

輿控玉蚪麟袍驚水怪龍笛起沙鷗爲惜殘紅盡
頻催大白浮羈愁三島草歸興五湖舟天地輸奇
句煙霞入遠眸風流供嘯傲身世任浮休客久遷
時序身遙想冕旒登臨王粲賦廊廟范公憂顧
忝登壇幸翻懷縮手愁那堪陪笑語祇合卧田疇
濫被容迂陋多慙辱訪諏仙舟同李郭詩句媿元
劉蹤跡悲蓬梗歡娛劇幻漚照筵燈落燼沉浦月
如鈎佳會終陳迹高歌欲白頭

登百祥樓次雲岡宮諭排律

薛廷寵

江上百祥樓祥光面面幽衣冠來上客形勝擬南州

彷彿蓬萊閣分明鸚鵡洲秀鍾綿福地名重壯遐陬
傑棟層巒入疎楹四野收鳥暈飛欲起燕雀賀曾遊
戍角巖邊警城鐘報曉籌紫霄隣跨鶴銀漢接牽牛
已離塵寰界宜從羽化游青山環列幃老樹偃盤虬
伐木聞樵斧垂綸進釣艘黿鼉時隱見日月自沉浮
林外看馴鹿沙間見狎鷗松霞拖綺幔荷露捧珠旒
蜃吐冥通海鯨吞忽撼楸星分聯楚越坤莫肇商周
雉堞臨波壯蜂屯抱嶺稠晴開千嶂靄冷浸一泓湫
騎氣迷黃道尋真認藥丘古今隨逝水宇宙盪虛舟
犀裂傳尤怪槎乘事已悠青春須載酒白首枉填溝

關塞來舒興江湖坐散憂莊生疑幻夢平子總閒愁
玩月耽清嘯紉蘭慕好脩終繻吾便棄班管若爲投
萬里寧家恤孤衷祗國謀長征歌四牡遐矚豁雙眸
王粲無勞賦箕邦且訪疇仙姿矜李郭大雅振曹劉
畫省承明寵玉堂閨苑儔泥函將鳳詔蕃錫播鴻
休登眺非娛暇諏咨願獻猷有懷思擊劒何意聽吹
篴泛壁情同適濯纓念獨羞鮮肥初入饌禽語亦成
謳豈敢芳辰負聊憑俚句酬十年頻道路百歲易浮
漚滕閣人安在蘭亭跡匪畱但逢行處樂莫向妄中
求煙艇絲三尺江天簾一鈎我家閩海上歸去理溪

頭

次韻

蘇世讓

清曉上高樓樓前景物幽挾漳倂濟府據汙類荆
州似入王官谷如臨帝子洲孤城連絕塞危檻壓
遐陬野闊山微露江平霧乍收地靈開淨界天借
辦清遊濤殷傳松籟鼉鳴報漏籌霞光朝纈錦劒
氣夜衝牛鷺向盤渦浴魚隨舞荇游金樽搖泛蟻
鐵笛動潛虬隔岸聞樵唱收筒見釣艘島煙晴淡
淡村靄晚浮浮淑氣迎黃鳥閒眠占白鷗侵筵花
爛繡拂面柳垂旒塔古封蒼蘚庭深長翠楸湖山

長自在歲月幾環周雨過黃梅熟春歸綠樹稠
香凝燕寢靈怪闕龍湫喜見雲間鳳來尋海上丘
鷄蛩初托契李郭慙同舟縱媿鄉音異還知道意
悠頑甌隣美玉濁水映清溝不盡登臨興翻懷進
退憂思鄉王粲賦戀闕子牟愁忽覺身迢遞渾忘
道阻脩知音絃可續侑酒轄頻投樂事隨時轉佳
辰與意謀乾坤供醉趣雲物惱吟眸薩水尋隋迹
箕都問禹疇詞腴咀屈宋詩壘感陳劉跌宕還堪
詫騰騫孰可儔聲華增煥赫名位肯卑休飯顆逢
工部山陰遇子猷薄肴陳菜藟俗樂奏笙篴接晤

真多幸承歡却自羞管窺那測大俚語不成謳祗
益丹心耿慚無白雪酬悲歡風裏燭聚散水中漚
場藿駒難繫鴻泥跡不畱此時心轉苦他日夢相
求江上雲千疊天涯月一鉤應添蘭菊思羈恨入
搔頭

肅寧館次雲岡韻

華察

溪邊楊柳欲飛花溪上輕鳧入槳牙庭院綠陰濃匝
地池塘青草亂鳴蛙江山雲日詩篇富鞍馬風塵道
路賒轉眼春光畱不住肯將心賞負年華

其二

白日游絲靜不收
短亭延佇獨夷猶
漁翁罷釣閒吹笛
牧豎歸村自跨牛
遠道祇憑春作伴
疎簾應待月爲鈎
晝長無事人偏倦
暫解征鞍一餉畱

薛廷寵

江山風物錦囊收
萬里諏咨裨未猶
每望京華依北斗
乍驚漢使犯牽牛
林鶯百轉遷青柳
海燕雙飛撲玉鈎
爲報春光已流轉
暫將歡賞寓攀畱

其二

無數風前亂落花
卽看燕子逐簷牙
綠槐庭院將擎蓋
青草池塘正聽蛙
客路不妨關塞遠
夜燈長伴夢

魂賒生年蹤跡矜奇絕異域山川恣物華

次韻

蘇世讓

看盡開花又落花山行馬怯石槎牙寒煙斷壠青
青麥細草荒池處處蛙一掬鄉愁猶遣興十分官
酒不勞賒奚囊政好勤收拾節序驚心鬢易華

客館霏微雨乍收宦情羈思兩夷猶幾年振珮趨
臺閣萬里乘槎訪斗牛煙合藤蘿迷谷口風飄花
絮撲簾鉤佳辰剩欲窮歡實底事韶華不肯畱

右和

正使

遠樹平原宿霧收一軒瀟灑暫夷猶塵生廣陌爭

馳馬草沒長堤已飯牛四月清和添客興三春景
物負詩鈎滿前花鳥空愁思不挽雙旌半日畱
游塵隔屋眼生花細嚼茶香爽齒牙疎箔捲時飛
紫燕小塘幽處戲青蛙雲深北極星辰遠路入東
溟日月賒莫訝通情憑譯語此心元不限中華右和
副使

古意用董公安定館韻

薛廷寵

浮雲日日行鷺林一枝定大塊咸垢埃白晝如長暝
出門雙龍泉見者那得省日月回精光山河忽滅景
琉璃匣中收自憐照孤影撥開黃土砂煉取金丹餅

翩翩事遠遊羽客相交頸來登凌霄臺世圖憤吞併
白日去不歸哀哉揮戈挺寧知物外身勝似囊中穎
道逢赤松翁美髯容秀整從之閬苑間回首迷追騁
南柯空一場推枕從茲醒

次韻

蘇世讓

侵晨發安輿過午風不定黃塵四面起白日忽幽
暝正苦翳玄花咫尺誰復省江山一百里揔是煙
中景林暄鳥弄音溪淺柳搖影煩襟擬一條滿碗
須八餅時時覓新句顧眄勞脰頸良辰與樂事此
地偶相併下里和雲璫洪鐘揮寸挺苦識不自量

猶欲試毫顙縮手合退休築壘本不整空軒愛閒
眠脩路倦馳騁念念已成灰恍然如夢醒

皇華集卷之二十四編目

嘉靖十八年己亥頒冊立

皇太子恭上

皇天上

帝泰號二詔使二

古詩二首

詩人子也文辭立

皇華集卷之二

皇華集卷之二

皇華集卷之二十四

謁箕子廟次雲岡韻

華察

寂寞荒祠感慨深清風千古激貪淫若爲隱忍不同
死須信佯狂獨苦心道在九疇非曲學詩成三嘆有
遺音行人莫問興亡事潦倒新亭酒謾斟

薛廷寵

被髮當年意獨深遜荒無奈錮驕淫道如有待傳皇
極事已難爲白此心殷室三仁昭定論東方八教振
遐音興亡不盡前朝恨再拜芳祠酒一斟

次韻

蘇世讓

炮烙煙飛惡更深顛隳天已厭奢淫可憐宗社圖
存日誰識先生不去心墓表歲荒松送籟洞庭風
暖鳥和音東人世世薰遺教香火春秋桂醕斟和
正使

沉痾成來日亦深玉杯其奈啓妖淫共回天命雖
無策自獻先王各有心洪範教存人起敬古祠春
遠鳥遺音東方蕉荔千年祀長把香醪滿竿斟和
副使

箕子操

華察

吾聞其名今未見其人吾見其墓今吾傷吾心鳥啾

啾兮樹陰陰山空空兮雲沉沉大賢去兮吾焉尋惟
曠世之相感兮有範至今下車展拜兮肆躑躅而悲
吟酌薶漿于一滴兮澆千古之胸襟

薛廷寵

繫玄鳥兮天命商世哲后兮祚靈光胡末造兮天無
良我求我靖兮獻于先王吁嗟兮我心孔疚兮謂我
爲狂

其二

瞻彼景山兮高巍巍帶河水兮受命宜國其弗祀兮
鐘簴移我爲奴兮皇皇何之吁嗟兮我生不辰兮逢

此百罹

次韻

蘇世讓

嗚呼奈何今孰知余此心仰視天宇今白日陰元
良已喪兮忠沉沉王子又去兮墜緒胡可尋隱忍
被髮兮越至于今琴操兮怨語麥歌兮苦吟潛思
泣血兮血下霑襟

右正
使韻

天疾威兮不祚我商目眚眚兮未見日光人其聖
善兮我無良欲幘我面兮羞我先王吁嗟兮我寧
爲奴兮寧忍發出狂

河水縈廻兮亳山峩巍殷受命兮百祿是宜命之

靡常兮今已移身可奴兮又安去之吁嗟兮不祥

之實兮我獨罹

右副使韻

登練光亭次雲岡韻

華察

水色分明濯錦江誰將匹練繫虛艘仙人黃鶴知何
許野老白鷗空自雙漁笛一聲歸極浦風帆千片落
晴窻皇家慶澤寬如海頻送恩波及遠邦

薛廷寵

練光亭下大同江落日江頭放釣艘翠嶺倒流還疊
疊黃鶯隔岸自雙雙光搖河漢來浮棟波隱魚龍欲
動窻林館樓臺多氣色天涯猶見此名邦

次韻

蘇世讓

斷續漁歌聲滿江楓林知繫釣魚艘
玻瓈倒浸雲千疊沙渚飛鳴鴈一雙
盡日水光搖玉簫有時霞彩泛紗窗
木瓜謾費酬瓊玖曹檜何心較楚邦

右和

正使

倚城高榭俯晴江江上牙樯泊畫艘
短笛騎牛人去獨暮煙飛浦鳥歸雙
春殘故國花如海簾捲清宵月滿窗
佳景政堪消客况莫愁旌節滯遐邦

右和

副使

觀射

華察

平圃風光入材官校藝時雕弓如月滿鳬矢學飈馳
破石思臬將穿楊想射師今朝落鵬手知是小由基

次韻

蘇世讓

鼓殷青山下侯張落日時月圓弓引滿星疾箭交
馳猛氣掀山岳威聲振虜師干城俱赳赳永保大
平基

觀射用雲岡韻

薛廷寵

城隅落日張布侯英雄種種來遐陬射虎俱能沒石
羽臂鷹便與絡圈韝手中盡挽弓五石百步之外無
遺鏃從容矍相視如堵競奇又見落旄頭一聲兩聲

鼓不歇少年意氣神邊籌仰視白雲不敢飛俯過江
水爲停流天山三箭那說捷氛侵萬里咸清收君不
見高麗三面臨邊鄙昔日百戰流血成川水只今大
平不釋兵永保封疆殿 天子

次韻

蘇世讓

箕城舊封古周侯雉堞繚繞江之陬城中猛士雲
爲屯氣如快鶻翻錦韞皇華此日始觀德百中不
數連四鍬弓燥手柔度則釋鼓聲打破雙鼉頭揖
讓上下君子爭坐中誰最能全籌當今文教覃四
海兔置干城皆勝流桓文霸業只尚力屏翰勲庸

良可收君不見隋皇開邊意未已恐使百萬蒼生
沉薩水邊頭不收風馬牛愛民天子保赤子

平壤登眺次雲岡韻

華察

王言誕遐方絳節出平壤華轍交平沙鏘鑾振清響
元良始正位萬國並延賞益道本無方推恩運諸掌
東土正陽回春風屈寒徃百卉枯復榮山林蕭以爽
物理數改移化機亦勞攘激石流清江依巖過晴舫
武陵津可問瀛洲路非枉日月麗重明亭宇豁弘敞
高情薄雲漢壯志闢林莽訪古興未畢登高意以廣
朝鮮覓箕封蓬島窺方丈萬象何森嚴三光盡昭晃

徘徊啓天達偃仰忘世網回首望中華尊王起遐想
海濱有遺賢披榛試探訪地僻風景殊雲動天光漾
再陟乙密臺疑揭清虛榜幻化本虛無陰陽定消長
及時須有爲慕古將安倣長嘯追風流擊節歌慨慷
王孫飲馬來士女割羊餉言語非支離衣冠亦高朗
六合同一家率土皆吾黨

次韻

蘇世讓

有美兩詩仙壯遊窮天壤探奇騁遐睎舒嘯發清
響閒作采真遊頗恣心目賞只愛富觀覽不敢勞
鞅掌在處過佳境命駕輒一往玉節駐箕都孟夏

景物爽山水競秀麗淨界無塵攘城南百丈江桃
浪搖畫舫相期事幽討時復驅車枉花欺錦袍鮮
柳拂玳筵敞暖風茁新卉好雨洗陳莽德巖屹而
峙井田平且廣敷衽謁文廟悅若登函丈練光俯
文漪丹棟光炯晃聯拳鷺立沙撥刺魚入網觴詠
恣酣暢蕭然散煩想風懷好翰寫俗謠動採訪容
與澹忘歸返照沉波漾樓臺動絢彩物色歸題榜
詞源與江水浩汗爭雄長顧我學捧心刻畫難模
倣空負清淨債默默生慨慷賴有麴米春開笑成
一餉樂事與意會襟懷覺清朗蓬心久倚麻狂簡

皇朝集
裁吾黨

宿大同館次雲岡韻

華察

聖王御極元無外四海車書揔一家已見烽煙銷戍
壘更聞聲教暨流沙江頭使節頻相送天上恩波
正未涯遙望翠華應返蹕夜來燈火喜生花

次韻

蘇世讓

古館長江同一號朝宗自是拱皇家八方文軌

通中土萬里風塵靜塞沙雲擁蓬萊瞻北極恩覃
海宇及東涯樓臺題遍驚人句詔使才名夢筆花

風月樓次雲岡韻

薛廷寵

玉樓畫壁晚雲涼野望分明破翳荒月上正涵池水
冷風來初度草花香從誇赤壁乘良夜更許濂溪挹
霽光暮日凭闌無限思煙波何處唱滄浪

次韻

蘇世讓

水窻雲閣未秋涼胸次迢然隘八荒嫩柳微風鶯
舌滑落花疎雨燕泥香雙清自信心無累一語從
知道有光勝地百年難衮衮瑤尊休惜醉淋浪

平壤勝蹟登覽未盡期旋節日畢之用大同館

龔韻

薛廷寵

使車萬里來茲土湖海襟期卽當家弔古訪幽行半

嶺登城觀射到平沙未酬詩債畱歸日無數風光僻
水涯爲報南薰能愛客芰荷早放映洲花

次韻

蘇世讓

紅素霏霏拂面多城中物色似仙家四山翠靄侵
朱栢十里青林映白沙已覺征輶窮海角幾回歸
夢遶天涯佳辰好值清和節莫把閒情感落花

觀鰲山

華察

鰲背羣峰面面開分明海上小蓬萊青天平壤水神
出白晝虛巖山鬼來共識恩光搖草樹非關蜃氣結
樓臺東風却妬繁華盛故遣須臾盡作灰

次韻

蘇世讓

人工奪得化工閑
百丈神山聳草萊
綰結巫雲粧黛出
敲嗟蜃氣駕鼈來
虹旗霓馬傾仙府
鳳管龍笙降玉臺
幻妄皆從天戲劇
却教回祿變成灰

泛大同江次雲岡韻

華察

畫船搖曳過江東
瀲灩晴波湛碧空
半捲湘簾飛燕雀
幾番桃浪變魚龍
天開巨壑分平壤
雲盡孤城見遠峰
共覩仙槎送仙客
旌旂簫鼓亂流中

薛廷寵

年來踪跡任西東
萬里乘槎泛碧空
三殿詔來光

映鳳百篇珠落誤驚龍漁人網集牽青鯉客子杯擎
對曉峰桂棹茅亭渾漫興此身如在五湖中

其二

白日西飛逝水東煙波萬里泛晴空渚青沙白閒鷗
鳥露冷雲深蟄水龍江上小樓櫓射鼓城中百戲開
鰲峰昨宵樂事俱疑夢盡在春流滾滾中

次韻

蘇世讓

碧沙青草岸西東多少層樓倚半空灩灩波頭飛
白鳥沉沉潭底睡驪龍酒巖俯瞰綾羅島兔嶺斜
連錦繡峰三老豈知身是畫一生長占水雲中

和右

正使

孤城臨野水流東海口潮回島嶼空帆影遙飛和
落鴈歌聲高起動眠龍煙波迥接三千界雲岫晴
連十二峰

江上數十里
有巫山十二峰

莫道江山渾寂寞一時

輸入醉吟中

淚水風煙故國東蒼蒼樹色遠連空雙飛旌蓋驚
幽鳥散擲珠璣與老龍清磬一聲何處寺丫鬟千
點夕陽峰朝天石上麒麟窟環珮魂遊月夜中

副使

生陽館午餉次韻

華察

驛路風塵撲面來，停驂剛喜一尊開。
重陰遠帶千株柳，爽氣虛疑百尺臺。
爲遣春愁成酒病，每酬詩債托吟腮。
閒隨白鹿循谿去，踏破松陰幾處苔。

次韻

蘇世讓

賓館歡迎玉節來，窻扉還爲好山開。
數家籬落依林麓，半嶺松杉護石臺。
幾處翠煙含柳眼，一庭紅雨褪桃腮。
振衣又向齊安道，滿目斜陽草似苔。

生陽館見桃花用韻

薛廷寵

乘槎應到武陵來，幾樹桃花向此開。
便作長安遊上苑，更疑王母下瑤臺。
露凝殘滴流朱粉，日照晴光映

絳腮對景且憑詩句賞莫教空恨染青苔

次韻

蘇世讓

洞天春後雨頻來萬樹桃花一夜開照耀川原迷
石室霏微庭院翳粧臺重重綠葉遮緗帶點點丹
霞染絳腮使節西歸應有日莫教零落委蒼苔

登廣遠樓次雲岡韻

華察

閒登高閣一憑闌恍惚清虛逼廣寒簫鼓祇疑天上
奏山川真似鏡中看春風回首悲王粲故國關心媿
伯鸞賤號山水爲梁鴻所隱之處弄笛欲乘黃鶴去樊籠無那滯

飛翰

次韻

蘇世讓

百尺高樓十二闌
樹林飛翠送輕寒
妍妍雲日綠簷轉
歷歷山川罨畫看
彩筆把來還倚馬
華旌停處欲驂鸞
仙梯一上塵機斷
疑有清風挾兩翰

曉登廣遠樓微雨次雲岡韻

薛廷寵

獨上高樓倚曉闌
前山疎雨颺輕寒
波光淡蕩兼天入
樹色滃濛帶霧看
幾處亭臺須品勝
羣公暇日稱鳴鸞
歸時趁得晴明候
便擬凌空一振翰

次韻

蘇世讓

嫩綠殘紅映畫闌
海天風雨不禁寒
千峰揔作圖

中景萬象都歸掌上看
浩汗詞源還倒峽淋漓
醉墨宛驚鸞蓬山只隔
三千里乘興何妨跨鶴
翰蘇贊政邀遊簇錦溪
雨不果赴次雲岡韻見情

華察

白日蒼煙匝地陰
畫船虛負碧溪潯
一春關塞多風雨
萬里江山自古今
水接天光浮遠樹
雲迷野色失遙岑
東君好客情無極
應比溪流百丈深

次韻

蘇世讓

斷堤楊柳綠成陰
一葉扁舟艤淺潯
肉眼幾人空過去
錦溪佳扁永來今
輕雲漠漠籠青草
小雨濛濛

濛洗碧岑爲報寒流休悵望歸時有約泛清深

棘城古戰場歌用雲岡韻

薛廷寵

君不見疎城古道臨塞荒黃雲黯黯沙草場羣山糾
紛河水走飛鳥不下豺兔蔽昔日百戰苦兵革白刃
金甲相輝光旌旗四面蔽原野揚旄對壘分成行前
軍後軍縱掩擊倏忽掎角殊難方鼓衰矢竭不得遁
提刀追砍如崩墻君不見高麗自昔稱瓜據君長氏
族何可詳三韓五部並勅敵靺鞨窺伺攻其傍連年
仇讐逞鬪殺秦漢五季時濫觴枕屍成丘暴沙骨弔
祭不至無杯漿只今煩冤夜鬼哭燐火閃歛魂遊翔

我來停車立道左風雨晝晦心悲愴更聞薰氣成疾
疫黃海一道民天傷胡不設壇起厲祭死者無冤生
無戕嗚呼皇天幸悔禍大平萬歲俾爾同靈長

次韻

蘇世讓

蒼涼野日照荒荒行人舉目知戰場當年白骨化
京觀冤氣鬱結於焉蔽啾啾鬼哭晝或聞夜夜陰
火寒無光云昔中原失撫馭元兵十萬亂其行橫
行不戢將自焚爲歿爲生迷去方奔崩到此勢自
感雲屯鐵騎如堵墻長平坑趙命已迫帳裏將軍
初未詳譬如雨雪見覲消一朝殲盡蒼山傍埋怨

此地便終古異域何人酹一觴
恭聞昔世行仁義王師所至迎
壺漿時無疫厲民不天和氣乃
與祥風翔嗚呼虞夏沒已久却
爲無辜還一愴文明天子撫四
海博施安民視如傷漸摩德教
無內外萬國兵革誰相戕皇華
此日一弔古悲風颯颯歌聲長

洞仙館次韻

華察

洞仙高館凌空起搖曳春風千
萬里錦樹瞳矐淑景明重林掩
靄嵐光紫雲影諸谿浮白波峰
回九曲堆青螺閒花落地時能
舞好鳥知春解作歌千山萬壑

何迢遞神仙羅列多鬢髻麗景紛紛照綺疏清陰習
習生羅袂我啣使命策輶車草木經春並茁芽王程
不盡常看柳客思多情爲折花中天夜夜瞻牛斗節
旄那敢辭奔走曾聞東國盛絃歌况復南山當戶牖
元良千載繼離明諸藩上表爭攄誠盡道太平全盛
日謳歌玉帛俱朝正文德如天同八極小臣敬奉黃
金勅登高弔古有餘情問俗觀風并多識曉來官路
淨纖塵雷雨初驚尺蠖伸當年多少題詩客總是東
西南北人

次韻

蘇世讓

嚴程初啓東風起一別燕京四千里共道前星光
照地鳳銜仙詔封泥紫青春得意四牡疾玉簫
晴吹搖青螺東方三月芳菲盛紫燕初舞鶯初歌
叨承一顧江上亭烹茶石鼎舉高髻自慚汗溝映
清流從此華筵接仙袂金樽綠酒洞仙館海邦春
味兼蘭芽珠璣咳唾聽下風筆底飛絮隨落花殷
勤唱酬忝已甚不鄙遐方牛馬走風騷壇上得指
南始信迷心還易牖論文何敢托知己自幸天仙
不阻誠微言一聽妙百中使人反顧求失正海隅
小儒那得此鴻恩私荷隨明勅從今不願萬戶侯

四海荊州欣一識人間聚散真須臾轉頭光陰催
屈伸他年玉堂與青瑣倘記仙蹤隨侍人

冒雨過洞仙館望鳳山漫興

薛廷寵

鳳山僊館東鼓翼凌霄隆西伯久不作鳳鳴詎能逢
山峻人寡跡雨陰望濛濛安得秦女簫吹向深山中
出門看山去長嘯思岐豐

次韻

蘇世讓

仙去洞寂寞鳳逝山穹窿虞韶久絕響瑞鳥今難
逢竹梧謾蒼翠煙雨空冥濛皇朝周道興雙鳳
來山中見此昭世瑞不必思岐豐

棲鳳亭次雲岡韻

華 察

嵯峨鳳凰山恍惚蓬萊島危亭構千尺蒼松成合抱
飛雨入林梢桃花紅更好我本神仙流臨池拾瑤草

次韻

蘇世讓

紅亭臨碧沼狀似浮蜃島旣無俗塵喧更有青山
抱月照秋正佳花開春亦好憑軒久不歸興入王
孫草

劒水館次雲岡韻

華 察

當年誰取龍泉劒此日空餘泉在山寒光欲射星斗
落戰血曾染征袍斑長蛟百尺不敢動壯士一去何

時還千秋寂寞徐君墓野草閒花夕照間

次韻

蘇世讓

水聲南澗聽潺潺萬壑風來雨滿山
暝合松丫饒鶴睡雲歸崖面濕苔斑
據鞍慙喜纖塵息倚柱時看倦翼還
更問龍泉何處是碧溪東畔翠林間

冒雨至劒水館卽赴龍泉漫興

薛廷寵

前山有龍泉此地名劒水龍泉出古
獄神物世所貴那能久世間白日水
中墜卷雲增九波騰空竟茫昧何年
東海來龍水從維類我本劒南人頗
識龍泉瑞驅車萬里征到此值陰晦
神物信有靈倏忽風雲會

願當還英雄遠遊一以佩水深山際昏勿使多魑魅

次韻

蘇世讓

雙劍落延津何年來此水地名托神物物貴地亦
貴拂鬱斗間氣不復匣中墜白日雷雨起乾坤變
幽昧凡物各有遇相感卽以類安得奉君子用爲
治世瑞誅妖又斬佞捲盡浮雲晦使節偶過此默
與意相會掘地如有得儻可充雜佩行行夜昏黑
前山泣魑魅

龍泉道中遇雨

華察

排雲出鳳嶺冒雨入龍泉雨濕花枝重泉鳴樹杪懸

翻疑馬上客却似洞中仙欲問桃源路還窺石屋天
瑤池含碧草丹竈生蒼煙暝色千巖合松聲萬壑傳
龍宮如可宿來共白雲眠

次韻

蘇世讓

劒吐干霄氣龍蟠漱玉泉陰雲千里合密雨半空
懸潤物敷皇澤催詩迓玉仙戒塵清野路涵景
媚江天乍衰花邊露輕添柳上煙空牽簑笠興欲
倩畫圖傳風伯還多事晴鳩聒晝眠

宿龍泉館

華察

龍窟深無極春泉脉正微星文動寶劒花雨點羅衣

照夜銀燈暗傳更玉漏稀遙看新柳色疑向鳳池歸

次韻

蘇世讓

劒水連蒼靄龍泉近翠微雨聲驚客夢嵐氣濕征衣
高柳綠初重小桃紅正稀千篇詩轉富應爲惜
春歸

曉發龍泉次雲岡夜宿韻

薛廷寵

冒雨行數嶺束火趨龍泉雨鳴火不熄照空燒紅煙
念此遠行邁風雨豈不疲王程本嚴亟使職焉敢虧
曉來看山色山雲連溪湄鳴泉響巖壑暗柳迷江堤
空山寡人跡好鳥擇深枝命駕不得息跋涉穿林陂

擾擾余倦役幽愁心自知天公邈我恤雲霧未全披
丈夫四方志蓬矢從所之願言崇令德努力以驅馳
歸來歌皇華持以酬清時

次韻

蘇世讓

夜來雨新霽淙淙鳴流泉熹微曙光浮壠頭猶沉
煙嚴程王事急不知鞍馬疲春光曾瞥眼海月
今幾虧衝泥度嶺路踏石行澗湄宮錦照花樹風
旗搖柳堤充飢餐紫霞繼佩折瓊枝才精百鍊鋼
量深千頃陂一曲和者寡幾洋誰得知瓊玖忽滿
手讀之不停披老我敢效顰雕腎羞退之空將鴛

寒資敢與天驥馳猶幸得附尾相追能幾時

館前有小河蘇國相治幕張具將邀余遊值雨
趣發不克赴悵然賦此用雲岡發龍泉韻

薛廷寵

一水橫中流兩岸蔽青柳已見綺羅幃况逢金玉友
豈不願一遊臨流看魚留雨色催征車停撓負溪叟
人事安可期眼前空萬有持杯問河靈聚散幾番酒

次韻

蘇世讓

羅幕臨清流陰陰映垂柳落花香滿溪林鶯相喚
友游鱗翻玉尺潑潑時入留隄擬駐雙節閒趣爭

漁叟繼占溪頭賞盡爲囊中有小雨忽相欺空負
金樽酒

冒雨至安城館次韻

華察

昨夜客窗聽未歇今朝又逐使車來青山傍午看猶
暗白日重陰撥不開愁絕此時侵薜荔興移何處坐
莓苔停驂便欲尋佳句詩思慚無倚馬才

次韻

蘇世讓

雨餘庭院靜炎埃排闥青山爽氣來幽砌偏鋪花
落淨疎簾閒放燕飛閑重重碧霧封溪樹陣陣清
風掃石苔滿壁明珠光奪目詞華空嘆古今才

東人多水田霖雨時至風物秀佳宜田家所便
余亦慨然有田園之樂忘行役之勞也作田家

樂四書安城館

薛廷寵

青山白草屋幾樹榆柳綠農人自力田所願亦易足
種桑五畝園種豆南山麓春至鶻鷃鳴薄言叱牛犢
餉婦持飯筐稚子相躑躅歸來及黃昏林卧馴麋鹿
山雨欲飛來谷風振平陸呼兒緝短簑明晨趁膏沃

其二

青春旣萌達朱火漸滿盈苕菜日以長蒲葉新抽青
昨夜溪雨過村村農事興朝來飯黃犢雙駕臨畱耕

黃鳥枝上語螭蛄田間鳴歸來未及飯把竿復溪行
釣得雙青鯉飽飯黃藜羹

其三

朝耕隴頭雲暮釣溪邊月鄰翁相呼喚禾黍好喜悅
兒孫無苦飢徵輸足公祿州縣不相呼笑傲深山獨
杏花明遠村俠客時追逐過門梁將軍白馬黃金絡
意氣軼五侯出身本輕薄誰知豪華凋不似田家樂

其四

牽犬出東門草深狐兔昏放鷹走長騎獸窮不得奔
割鮮更傾酒醉卧歌田園東鄰少年郎昨日趨塞垣

三
身
集
卷
之
一
決身死行伍志在沐君恩
春田沒荒草有婦行采蘩
骨肉各一處功名安足論
但願廣田圃長以娛兒孫

次韻

蘇世讓

條風回青陽遠林漲新綠
村村農務急政值膏雨
足污畚接川原高壠緣山麓
田頭飯耕牛草際眠
黃犢相將理荒穢勉勉循前躅
荷鋤暮還家暗逕
隨歸鹿兒童候荆門
芻狗散平陸明朝飼蠶飢
又看桑葉沃

決渠水汨汨灌此田
疇盈插秧滿南畝已復搖青
青辛勤少眠卧相戒侵晨興
今年節序早布穀催

春耕風暄樹林幽好鳥相和鳴望望饁婦來一犬
隨人行田間餉午飯瓦缶溪毛羹

落日牛羊歸茅簷照新月農談四鄰起婦姑相怡
悅平生服田勞不受公家祿登場饒菽粟生事頗
幽獨親黨喜經過酒食相徵逐朱陳自成村墻屋
互聯絡野興山色濃世味秋光薄出門卽逍遙田
家樂復樂

夏夜苦易曉冬日苦易昏四時各平分日月雙輪
奔雞豚伐社鼓樂事在田園我家住湖南翠竹連
墻垣塵埃三十年未退緣貪恩春暉戀菽水霜露

感蘋蘩忽忽只自憐悠悠何足論努力事耕桑安
以遺子孫

翠屏山卽事作廻文一律

華察

屏雲翠染玉溪前影蕩輕波碧浸天汀柳細遮陰洞
石澗芹香帶暗流泉青山遠送愁中雨綠草新含野
外煙亭畔水聲松畔屋清風晚渚傍鷗眠

薛廷寵

屏山萬疊擁樓前獨鳥歸飛靜遠天汀白見添新過
雨澗鳴聽徹細泠泉青松偃蓋濃遮嶺綠柳搖絲裊
帶煙亭館醉吟成逸興清陰遶座入雲眠

次韻

蘇世讓

屏擁高崖環後前小筵開處野連天汀飄絮急風
搖柳壑轉雷喧石噴泉青送晚山遙帶雨綠添新
樹遠浮煙亭亭聳翠松擎蓋清嘯舒時驚鶴眠

右和

正使

屏開遠畫展峰前落日江波碧蘸天汀滿雪時風
逐絮壑鳴箏處石流泉青青草色春含雨靄靄山
光暮惹煙亭外花殘香細細清風小榻一閒眠

右和

副使

雨後遊蔥秀山次雲岡韻

華察

山花開遍東風裏山色空濛煙霧起夜來風雨落花
多踏破紛紛紅與紫青天削出翠屏風屹立龍門相
對峙憑高一望羣峰低萬壑千巖何迤邐飛泉一派
何處來但見山前水清瀾花落花開山不知嘆息春
光逐流水平生浪跡半天涯海內名山堪屈指振衣
長嘯回天風山頭百草皆披靡主人娛客百技呈無
數材官帶弓矢酒闌逐犬搏生麇更呼蒼鷹擊雙雉
朱旂素幕感飛觴臨流席地歡無已玉堂青瑣多名
流巢業穹碑樹山址山經題品應倍高萬物於人係
成毀

薛廷寵

寂寞青山雲霧裏油幢布幕當空起行厨溪邊洗玉
盤錦茵鋪地燦緋紫當前正是蔥秀山翠屏背出相
雄峙前山壁立峭且奇後山隱隱來迤邐巖泉溪水
並清冽昨夜雨過流漫瀾藤蘿交陰松栢蒼倒景移
雲映流水上有孤亭雙立碑雨痕剝落苔染指編籬
更向溪之湄遊魚入籬意疲靡放鷹走狗奔巉巖野
麇逸出斃流矢庖人割鮮來侑觴山人挾弓來獻雉
騎士如雲卒如蟻雨昏日暮樂事已從前幾度此山
遊只今芳草藉幽址浮雲流水日日行惟有青山長

皇華集
不毀

次韻

蘇世讓

浮生役役黃塵裏萬事令人催早起將身一縛名
利韁多少馳驅競青紫溪山寂寥誰得遊蔥翠雙
峰空對峙皇華到此惜淹畱山下曼程忘迤邐巖
花春後尚餘紅一帶溪流清瀾瀾光陰冉冉不曾
畱逝者如斯宜視水况是清和天氣佳雲幕行厨
集千指眼中景物爭效技紅紛綠駭風前靡偷得
一閒胡不飲聖賢未免爲嗃矢黃犬牽來走驚鹿
蒼鷹擊處落雄雉少年舊興忽搖臂却憶家山心

未已昔賢曾此畱綺語龜趺屹立山之址千年勝

跡去後思峻岳高名同不毀

右和正使

峻嶺高入層霄裏勢若天矯雙龍起雨洗鴉鬟黛
色青霞蒸赤城煙光紫峩峩翠屏亘其西儼如冠
劒屹相峙蒼藤翠木翳日月洞壑窈窕爭迤邐流
泉激石碎玦環跳波下瀨流瀾瀾天上遊仙偶過
此驚見宮袍照綠水觀魚縱獵供一笑盡取奇觀
歸點指山鳴谷應萬夫呌眼看草木從風靡飛走
無路呀且號洞腋牙鑿殫一矢蒼鷹老拳亦一試
脫鞬須臾掣錦雉燎毛擊鮮最可樂置酒傳觴觀

未已茲遊奇絕繼前蹤昔人行樂有遺址好將椽
筆寫新篇名與此山俱不毀右和副使

觀魚

薛廷寵

挿棘編籬壅水渦遊魚作隊動清波百年諫草慚僖
伯樂事今朝敢自多

次韻

蘇世讓

浮萍斷處水生渦知有游魚戲綠波相對兩忘魚
與我濠梁分別一何多

觀獵

薛廷寵

一箭當場斃野麇放鷹走狗競譟呶禽荒亦犯匡時

戒誰爲先生作解嘲

次韻

蘇世讓

兀兀原頭走鹿麕萬夫馳逐語呶呶雄心直欲追
雲夢敢避淫奢賦客嘲

寶山館次雲岡韻

華察

驅車出安城日暮投寶山不見山頭寶但見楣上顏
人心本大虛赤山一培塿况此賈禍資於我復何有
嗤彼貪夫愚私欲相紛糾泣玉足竟刖蔽珠腹自剖
且挿頭上花謾飲杯中酒崑山多良璧飢來不充口
何當寶才賢相與圖不朽

次韻

蘇世讓

金多出麗水銅又生蜀山此地有何寶名字托孱
顏山勢偶穹窿尋常一土塿蒼勾煙雲氣其中卽
無有一自寶爲名俚俗謾紛糾千載眩名實至理
誰細剖愚溪本非愚酒泉寧有酒無情了不知欺
誣在人口珍重皇華詩垂示良不朽

寶山館

薛廷寵

劒水元無劒龍泉未見龍寶山空置辨詞客總雕胸
豈必金銀氣但看翠黛容憑君珍重此對酒意無窮

次韻

蘇世讓

快覩人中鳳驚看筆下龍風煙爭入手雲夢幾吞
胸綠水增含態青山爲改容共欣迎使節誰信坐
詩窮

金巖館次韻

華察

綠樹黃鸝弄好音慣於詩客助豪吟酒闌慷慨飛霜
劍賦就鏗鏘擲地金到處江山俱入品故園風物幾
關心徘徊獨向巖前立貪看松蘿滿地陰

薛廷寵

彷彿花飛鳥送音停車無暇索清吟自憐客路三千
里多負春宵一刻金東國山川忙過眼南薰氣候轉

驚心直前見說 王京邇乍喜新晴度綠陰

次韻

蘇世讓

半生塵世少知音
快手今看繼八吟
形穢謾慚隣
白玉橐空誰復溷
黃金千尋山暗松
生腹一道溪
環石鎮心郵吏不知
春色盡夕陽猶自坐
花陰

右和

正使

隔葉流鶯自好音
此間端合着閒吟
謾勞遠地淹
雙節空負華筵直
一金客路尋常催
鬢雪年光各
易損春心匆匆未暇
酬佳境愧殺忘機老
漢陰

右和

副使

渡猪灘次雲岡韻

華察

灘頭春水綠迢迢誰架長松百尺橋自是乘船有深
戒鑿輿何處度山椒

薛廷寵

一曲溪流古渡遙長松百丈架新橋林花野草隨波
出香氣渾如百和椒

次韻

蘇世讓

桃源歸路迢迢迢誰爲遊仙構畫橋采得江籬携

滿袖好紉蘭佩雜申椒

右和
正使

日日塵埃去路遙清灘暫喜俯長橋發揮更有瓊

琚句贏得芳香當桂椒

右和副使

過興義館喜晴次雲岡韻

華察

馬蹄亂踏梨花雪湍籟爭喧雜鳥聲最是山村風日
好夕陽門巷半柴荆

其二

千巖晴日映樓臺雨過幽谿長綠苔庭院深深人不
到空樑惟有燕飛來

其三

日暖沙晴落水痕酒旗風颺杏花村解鞍欲息征途
困津吏無端復候門

次韻

蘇世讓

一邊野色連山色半嶺松聲間水聲忽有小童來
賣酒喜看村路入榛荆

亭亭松盖偃平臺歲久無人長碧苔風定小軒成
午睡晚雲低度短堦來

野水平添過雨痕夕陽離落數家村山翁不管春
歸去垂柳陰中獨掩門

午憩興義館次雲岡韻

薛廷寵

朱旂盡繞青山曲鐃鼓深深出谷聲驅馬更從何處
去江村白日掩柴荆

其二

藤木交陰蔽石臺年年煙雨長新苔從前見說高麗
日興義將軍奏凱來

其三

落花流去水無痕野樹連雲靜遠村日暮小堂高坐
處浴鳬飛鷺巧當門

次韻

蘇世讓

隨車雨已報新晴何處黃鸝一兩聲日躡龍門真
竊忝從今不願識韓荆

連空霽色映樓臺溪水澄澄染碧苔鷓鴣鳴殘花

尚在天教畱待玉人來

經過石齒碎苔痕日午孤煙起遠村妙曲從來知
寡和空慚布鼓過雷門

吾助川次雲岡韻

薛廷寵

東來江水鴨頭綠萬派千流繞山曲行人日日涉春
津春雨霏霏暗初旭吾助川水稱洪流新橋百丈橫
空舟曾助文人斜點筆詞源滾滾三峽出曾助山人
作勝區結茆依水號少室曾助士人學釣鰲龍門一
躍輕風濤曾助東人作天塹咫尺不得攀巖蒿吾助
川清徹底亦當助吾一勺水紙上雲煙龍飛起

次韻

蘇世讓

青山影蘸川水綠
川水悠悠轉山曲
長途倦客眼忽明
汀草溪花散朝旭
朱欄板橋截晴流
落紅繽紛橫渡舟
囊中賴有舊詩筆
欲把煙光描寫出
真源悵望未可窮
佳處便擬畱石室
聞道三山失六鼇
渤海浩淼多風濤
那知昔日遊仙處
金銀宮闕生蓬蒿
吾助川漱巖底煙
波彷彿桃源水
定有幽人卧不起

宿金郊館次董學士韻

華察

候館向金郊
庭深綠樹交
殘春花委地
落日燕歸巢

牧豎忙驅犢獵人爭射麇巡簷愛新霽月色蒲山坳

薛廷寵

白馬度金郊清和四月交美花明刺草山鳥暮歸巢
稚子竿田雀將軍獵野麇有懷憐對景無語背空坳

次韻

蘇世讓

古館俯青郊陰陰林木交柱穿蜂釀蜜簷短鳥爭
巢晚飯供山蕪新羞炙野麇蓬萊接雲氣回首憶

螭坳

右和
正使

碧草滿平郊天時春夏交嫣紅迷蝶夢嫩綠護鶯
巢林靜聞啼鳥山深有卧麇小庭聊散步屐齒印

苔坳

右和副使

入閤城次董韻

華察

城上諸峰萬點尖
碧天如洗見毫纖
殊方習俗勞相問
夾道居人屬具瞻
日用尋常惟粟帛
海邦生產盡魚鹽
賢侯到處張高燕
知爲王人惜陞廉

薛廷寵

池上青蒲刺劒尖
陌頭煙柳裊絲纖
乍看朱火隨杓轉
每戀京華倚斗瞻
藩國高情彌綺麗
書生薄分只薤鹽
囊中珠玉偏盈貯
應說當年也未廉

次韻

蘇世讓

摹寫 皇恩禿筆尖不遺遐邇通與洪纖十行綸綍
從天降滿路耄倪拭目瞻區宇休光澄少海使華
清節罷形鹽吟邊每動煙霞興轉覺貪山未害廉

右和
正使

雨洗天磨

山名

露碧尖雲間遙見玉纖纖山川不改

當時色閭井多非舊日瞻地近東華通貨貿利窮
西海足魚鹽百年文教今尤盛人誦詩書士尚廉

右和
副使

鐵

鹽
天

點火看大如洗目

同西吳公盤百字文楚金大益人

普神會同表之非書日韻世漢東華記於寶休寧

雨
天
觀
各
靈
善
大
雲
間
登
見
生
緣
蘇
作
此
不
如

五言古詩


欽定四庫全書

武翁羅漢堂今變長城戲書輒覺食山未害興

天宮南經筆見卷八

皇華集卷之二十四

尖不影疑厥與共遊十餘載





華皇

三